



Saunoaga Autū ale Afioga ile Minisita

Fonotaga Faale-Tausaga Lona 15 a le Soifua Maloloina

Susuga i le Fa'afeagaiga, Rev. Siaosi Salesulu
Susuga i Fa'auluuluga o Pa'aga Fa'ava-o-Malo
Susuga i Fa'auluuluga o Matagaluega ma Fa'alapotopotoga a le Malo
Le Mamalu o Ta'ita'i o le Vaega Lautele o le Soifua Maloloina
E'eta'i a tatou malo fa'aaloaloga ma vala'aulia
Le loaloa ua aofaga potopoto mai i lenei taeao

Talofa, Talofa Lava!

O lenei fa'amoemoe ua tatou potopoto ai i lenei taeao, o se tasi lenei o fa'amoemoe tāua e tavaluga iai le fa'amanatuina o le Vaiaso o le Soifua Maloloina i tausaga ta'iasi. O le 'auga ma le fa'amoemoe, ina ia tatou omai tatou te nuti mea fa'atasi, ma o tatou aao manogi, e fa'atalanoa ma fetufa'ai fa'ale-aiga o le Soifua Maloloina, i galuega ma polokalame sa o tatou galulue ai i lea tausaga ma lea tausaga, e tatou te patipatia galuega ua 'ausia ma toe matimati galuega e mo'omia le fa'aleleia.

O le autū filifilia o le fonotaga fa'ale-tausaga mo lenei tausaga ua fa'aautūina e fa'aapea: **'U'una'ia le Fa'atinoga ma Atina'e Tomai Tau Su'esu'ega Fa'ale-Soifua Maloloina**". O lo o fa'amamafa ile autū o lenei fonotaga le u'una'ia o le faatinoina o su'esu'ega tau le Soifua Maloloina, ma atina'e tomai o le afaigaluega e fa'atinoina ai lea matafaioi fa'atulafonoina o le Matagaluega, e fesoasoani ai ile fa'aleleia o le fa'agasologa o auaunaga tau le Soifua Maloloina i ona vaega autu e ono e aofia ai:

- Ta'ita'iga ma Pulega Tau le Soifua Maloloina

- Auaigaluega o le Soifua Maloloina
- Fa'atupeina o le Soifua Maloloina
- Fa'afoeina o Fa'amaumauga ma Fa'amatalaga o le Soifua Maloloina
- Fa'afoeina ma le Puleaina o Oloa Tau le Soifua Maloloina ma Teknolosi fa'apea ai ma le
- Fa'atinoga o Auaunaga o le Soifua Maloloina i ona vaega eseese.

O le fesili, e fa'apea ona u'una'ia ma siitia le tomai o le auaigaluega ile fa'afoeina o su'esu'ega tau le Soifua Maloloina?

E mau eseese lava finagalo e tali ai lenei fesili. Peita'i ane ile talu atu a le Matagaluega o le Soifua Maloloina, o lea ua amata mea ile fausiaina o le Ta'iala e Fa'afoeina ai Su'esu'ega Tau le Soifua Maloloina, ma o lo o lima ta'ita'iina ai galuega fa'atino a le Komiti o Su'esu'ega Tau le Soifua Maloloina, ina ia mautinoa, o lo o fa'amalieina vaega uma e tataua ona mulimulita'ia ei latou e talosaga mai mo le fa'atinoga o nei su'esu'ega. E le gata i lea, ua iai foi avanoa e fa'alauteleina ai le tomai ma agava'a o le auaigaluega o le Soifua Maloloina ile fa'atinoga o lenei matafaioi, e taua mai ia tatou pa'aga tau atina'e e pei ona iai le Fa'alapotopotoga o le Soifua Maloloina o le Lalolagi, o le Malo o Niu Sila ma Ausetalia.

I mataupu talanodina o le fonotaga ile asō, o le a fa'ailo ma fa'amanino ai nisi o vaega tāua o su'esu'ega tau le Soifua Maloloina, ma folasia ai taualumaga o nisi o su'esu'ega ua mae'a fa'atino e le gata e lunivesite i atunu'u i fafo ma Samoa nei o lo o fa'atautaia su'esu'ega o le Soifua Maloloina, ae fa'apea foi ile mamalu o le auaigaluega o le Soifua Maloloina sa fa'atautaia a latou su'esu'ega.

O lea foi ua tatou molimauina i lenei taeao, nisi o lomiga ua mae'a tapenaina e le Matagaluega ma le Vaega Lautele o le Soifua Maloloina, fa'atasi ai ma le tu'u mai o tau'au o a tatou pa'aga fesoasoani, o lo o atagia ai taualumaga o nisi o su'esu'ega tau le Soifua Maloloina sa fa'afoeina. O nei lomiga e aofia ai:

- (1) Fuafuaga Autasi Fa'aauau a le Matagaluega o le Soifua Maloloina TF 2023/24 – TF2024/25
- (2) Fuafuaga o Galuega Fa'atino mo le Puleaina o le Fa'aaogaina o Fuala'au Tui 2023-2028
- (3) Faiga Fa'avae toe lloilo mo le Polokalame mo Gasegase Auina atu i Fafo mo Togafitiga 2023
- (4) Faiga Fa'avae ma le Fuafuaga mo le Fa'afoeina o Vaila'au ma Fuala'au mo Togafitiga TF2023/24-TF2027/28
- (5) Ta'iala mo le Tafiesea o le Kanesa Tau Tama'ita'i (Cervical Cancer) 2023
- (6) Ta'iala mo le Fa'afoeina o Tui Puipui Masani 2023
- (7) Ta'iala mo Feso'ota'iga ma le Suia o Amioga ile Taumafa Tapa'a 2023

E fa'aleo ai le agaga fa'afetai tele ia tatou pa'aga fesoasoani i le ofoina mai o fesoasoani tau seleni ma toma'i fa'apitoa e lagolagosua ai le tapenaga o nei lomiga o le Soifua Maloloina.

O le ki mo le ausiaina ma le taunu'u ise taunu'uga lelei o nei taumafaiga uma, o le u'una'ia lea o le fa'atinoga ma le atina'ega o tomai ma agava'a e fa'atinoina ai su'esu'ega tau le Soifua Maloloina e alai le galulue fa'atasi o vaega uma; aemaise ai o le amana'ia o le sao o le atunu'u lautele i atina'e tau le Soifua Maloloina; e pei ona atagia ile autū o lenei vaiaso fa'apitoa o le Soifua Maloloina: **“Ia Ta'imua Nu'u ma Afio'aga”**. Oi latou nei tatou te mo'omia tele la latou fesoasoani ile atina'ega ma le fa'aleleia o le fa'agasologa o auunaga a le Soifua Maloloina, e aofia ai ma le fa'atautaia o su'esu'ega tau le Soifua Maloloina, ina ia mautinoa o lo o moni fa'amaumauga ma fa'amatalaga o lo o fa'avae ai le fausia o ta'iala ma faiga fa'avae o le Soifua Maloloina, fa'apea le fa'aleleia o auunaga.

O mataupu o le a fa'atalanoaina ile fonotaga i lenei aso, e talitonu le manatu, o le a tele sona aoga ile faufauina o a tatou galuega ma polokalame fa'atino, aemaise o auunaga mo le Soifua Maloloina o o tatou tagata.

E fa'aiu atu ai se fa'amatalaga i lenei taeao, ile momoli atu o le agaga fa'amalo male fa'afetai ile pa'ia ua aofaga potopoto mai tatou te molimauina ma fa'atāuaina lenei fa'amoemoe.



O fa'atasiga fa'apenei, o se avanoa tāua tatou te toe tōmanatu ai ile tele o galuega sa tatou fa'atinoia mo le Soifua Maloloina ma le manuia o le atunuu. E le gata i lea, ae toe matimati ai foi nisi o vaega o le tatou auaunaga auā le aga'i i luma.

Ia alofagia e le Atua lenei fonotaga ma ia fa'atamaoigaina fefa'asoa'iga i manatu ma mafaufauga lelei, e poupoua'i a tatou galuega mo le aga'i i luma.

O lea, ua tatalaina aloa'ia nei le fonotaga lona 15 a le Soifua Maloloina, fa'apea ai ma lomiga ua fa'alauiloina ile asō.

Soifua ma ia manuia.